

IL CJASOT DAL BARBE BARBE

Cheste setemane o scomencin cuntune conte gjavade di "Storiis dal barbe Barbe" di Gianni Rodari, par rivâ daspò a costruî la nestre "cove segrete".

Cognossêso il barbe Barbe? Voaltris no e jo si. Al è vieli, plui vieli di ducj, plui vieli ancje di se. La sô barbe e je diventade ogni an plui lungje, e lui no le à mai fate taiâ. E je diventade tant lungje che il barbe Barbe, cuant che al va a spas, si inçopede simpri inte sô barbe e al cole. Ce fasial alore? Al compre une valisute e dentri al met la barbe, chê part de barbe che no lu lasse cjaminâ. Al va ator cu la valisute e al somee un viazadôr di cumierç che al vent cjocolate e caramelis: invezit inte valisute nol à nuie altri che la sô barbe. E je une barbe tant lungje che il barbe Barbe cuant che al à sium e al è pai cjamps, là che nol è nuie par parâsi dal soreli, al fâs un cjasot cu la sô barbe. Cemût fasial? Al plante doi pâi e su la piche al tache la ponte de barbe: cul rest de barbe al fâs il tet e lis parêts dal cjasot. Si met distirât là che la sô barbe i fâs ombrene e al duar. A viodilu di lontan al è un cjasot dut blanc: e somee une cjase di nêf, come chês dai eschimis. Invezit e je la cjasute fate cu la barbe dal barbe Barbe.

Fasin un teepee indian

Ce che al covente:

6 cjanis di bambù (si comprin tal vivâr)
3 metris x 1,40 di stofe e anei di plastiche par tendis
Asulis di metal (si cjatin in marçarie) cul kit par fissâlis
Fuarpis, gusiele e fil, cuarde, 3 elastics


1. Meti dongje lis cjanis e peâlis cui elastics a 20 cm de estremitât. Vierzilis a cercli e controlâ che a sedin stabilis.

2. Cjapâ la stofe e pleâle in doi sul lât plui lunc e daspò pleâ ancjemò in diagonâl. Segnâ cuntun zes un semicercli e taiâ. Te altre ponte dal triangul, taiâ un altri semicercli.

3. Montâ la stofe su lis cjanis e cun cualchi spile segnâ par di fûr il pont dulâ che i pâi a varan di jessi fissâts al tiessût. Cjapâ i anei di plastiche e fissâju cun gusiele e fil par dentri, dal alt al bas, tal pont che si veve segnalât cu lis spilis.

4. Partint di 2 cm di distance de buse in alt, fâ cualchi busute distante 5 cm indulâ fissâ lis asulis: inserî la cuarde, incrosante tant che i laçs des scarpis. A chest pont clame un ami a judâti par inserî la stofe tai pâi e par slargjâ la struture.

Rispuint come Proust



Non

BENEDETTA

Etât

8 AGNS (CUASI 9)

Dulà sêstu a stâ

A SANT DENËL

Ce ti plasial de tô citât/dal to pais

MUSEU DAL TERRITORI

Ce no ti plasial de tô citât/dal to pais

MIERDUCIS SUL MARÇJEPÛT

Miôr ami o amie

PIER, LAURA R.

Il to difiet

UN TIC DISORDENADE

Il difiet dai tiei gjenitôrs

A TABAIN LUI POC, JË MASSE

La ultime volte che tu âs vaiût

NO MI VISI

Lis vacancis plui divertentis

A PARIGGI

Il colôr che ti plâs di plui

VIOLE

Il nemâl che ti plâs di plui

GJAT

Ce robe ti avilissie

PEPPA PIG

Ce no ti plasial fâ

RIORDENÂ

Ce ti fasial pôre

LA FIN DAL MONT

Ce volaessistu fâ di grande/grant

ARCHEOLIC

Il libri o film che ti à plasût di plui

MATILDE DI ROALD DAHL

I nons che ti plasîn di plui

MATILDE, MAURO

Robe di bevi preferide

AGHE

Robe di mangjâ che ti plâs di plui

TOAST

Personaç preferît/preferide

MIA (DI MIA AND ME)

Il to pipinot

SCOI (UN SGHIRAT)



LA FILASTROCJE

coce



Coce sbusade,
muse di strie.
Mame, ce pôre!
Miôr scjampâ vie!

CE ISAL?

Al puarte la corone e nol è re,
al cjante matutin e nol è frari,
al à la barbe e nol è capucin,
al à i spirons e pûr nol è soldât.

PIRON È SEDON



Gnocs Di Coce: Un al tire chel altri!

Ce che al covente
Pai gnocs:

400 gr di coce

100 gr di farine di flôr

1 ūf
sâl

E Par cuinçâju:

20 gr di spongje

20 gr di scuete fumade

4 fueis di
salvie

O sin ancjemò tal mès de coce e alore gnocs par ducj! Come che tu âs imparât lis setemanis stadis, prime di dut tu âs di taiâ la coce a fetis, spelâl e cueile te atomiche, di mût che e sedi mole e si rivi a sfracaiâl cul piron.

Metile intun cjadin, zonte il sâl e l'ūf e messede ben.



UNE RIDUÇADE...



Jacum i domande a so pari: Papâ ti plasie la ue passe?
E il pari: Parcè po?
Jacum: Parcè che al sta brusant il vignâl

AHHH! LA RISPUESTE DAL NUMAR STÂT

L'ai

Po tamese la farine e metile dentri un pocje ae volte, simpri messedant. E achì al rive il difilic, parcè che no tu âs di meti ni masse farine (che se no i gnocs a vegnin dûrs) ni masse pocje (che alore i gnocs no vegnin propit!). L'impast al à di jessi tenar ma no mol, cjale te fotografie chi dongje cemût che al ven jù ben planc de sedon. Cuei i gnocs te aghe bulinte salade. Metiju dentri un pôcs ae volte judanti cuntune sedonute, e cuant che a vegnin sù juditi cul rai par tirâju fûr... Ti visistu che lu vin doprât te prime ricete?

Par cuinçâju disfe la spongje intune fersorie e met dentri lis fueis di salvie, cussì e cjape un bon savôr. Met i gnocs intun biel plat, butii parsore la spongje disfate e sauride e spolverâju cu la scuete fumade gratade. Scometino che no 'nt vanzarà nancje un?

